

## ღია მმართველობა საქართველო საჯარო კონსულტაციები 2014

ღია მმართველობა საქართველოს საჯარო კონსულტაცია 11 აპრილს ქალაქ თბილისში, საქართველოს საზოგადოებრივ საქმეთა ინსტიტუტში გაიმართა. შეხვედრას სხვადასხვა კურსისა და მიმართულების სტუდენტები ესწრებოდნენ.

შეხვედრის ფარგლებში ღია მმართველობა საქართველოს ეროვნულმა კოორდინატორმა ქეთი ცანავამ და „ფონდი – ღია საზოგადოება საქართველოს“ წარმომადგენელმა ვაკო ნაცვლიშვილმა შეკრებილ საზოგადოებას გააცნეს მთავრობის ის ინიციატივები, რომელთა მიზანია მთავრობის ღიაობის, გამჭვირვალობისა და მოქალაქეთა წინაშე ანგარიშვალდებულების გაზრდა და რომლებიც დაგეგმილია, რომ ვალდებულებების სახით ჩაიდოს ღია მმართველობა საქართველოს 2014–2015 წლის სამოქმედო გეგმაში.

### შეხვედრის მონაწილეებმა ყურადღება გაამახვილეს შემდეგ საკითხებზე:

- შეხვედრაზე დამსწრე სტუდენტებმა აღნიშნეს, რომ სურთ საჯარო დაწესებულებებმა უფრო მეტი სტაჟირების შესაძლებლობა შესთავაზონ სტუდენტებს სხვადასხვა მიმართულებით. მათი თქმით, ეს მნიშვნელოვნად გააღრმავებდა მათი ცოდნის დონეს და შესძენდა საჭირო პრაქტიკას, საჯარო სამსახური კი თავის მხრივ იზრუნებდა სამომავლოდ კადრების მომზადებაზე და მათი პროფესიული უნარ–ჩვევების დახვეწაზე. სტუდენტთა ნაწილმა დასძინა, რომ ამგვარი შესაძლებლობის გზით მათ თეორიულთან ერთად, პრაქტიკული ცოდნის მიღების საშუალებაც გაუჩნდებოდათ. ამასთან, სტუდენტებმა ყურადღება გაამახვილეს იმ გარემოებაზე, რომ სტაჟირება მორგებული უნდა იყოს მათ სასწავლო გრაფიკზე, რათა განათლების მიღებაში ხელი არ შეეშალოთ.
- შეხვედრის მონაწილეთა ნაწილმა აღნიშნა, რომ მათთვის და, ზოგადად, საზოგადოებისთვის, ხშირად ცნობილი არ არის მიმდინარე რეფორმების და სიახლეების შესახებ მიუხედავად იმისა, რომ ხშირად უსმენენ ახალ ამბებს ან კითხულობენ ასეთის შესახებ. სტუდენტთა თქმით, ხშირ შემთხვევაში მათ ინფორმაცია რომელიმე მიმდინარე რეფორმის შესახებ ამ პროცესში ჩართული პროფესორ-მასწავლებლებისგან აქვთ და რომ არა ისინი, ვარაუდობენ, რომ რიგი საკითხები მათი ყურადღების მიღმა დარჩებოდა. შეხვედრის მონაწილეთა აზრით, მთავრობამ უნდა შეიმუშაოს სტრატეგია თუ როგორ მოახდენს საზოგადოების ყველა ფენის ინფორმირებას და უზრუნველყოფს მათ პროცესებში ჩართულობას. სტუდენტთა აზრით, ამ პროცესში მნიშვნელოვანი როლი უნდა ითამაშონ არასამთავრობო ორგანიზაციებმა.

შეხვედრის ოქმი

11 აპრილი, საქართველოს საზოგადოებრივ საქმეთა ინსტიტუტი (GIPA)

- შეხვედრის მონაწილეთა აზრით, სასურველია ფასების შემცირება იუსტიციის სახლის სერვისებზე, რაც მათ საშუალებას მისცემდა უფრო აქტიურად ესარგებლათ სხვადასხვა მომსახურებით. სტუდენტები სურვილს გამოთქვამენ ხელისუფლებამ მეტი იფიქროს სტუდენტთა განვითარებაზე და მათ ხელშეწყობაზე თუნდაც სხვადასხვა სერვისზე განსხვავებული, დაბალი ტარიფების დაწესების გზით.
  
- შეხვედრის მონაწილეებისთვის ერთ–ერთი საინტერესო თემა აღმოჩნდა მიმდინარე რეფორმა ინფორმაციის თავისუფლების სფეროში. სტუდენტები ამბობენ, რომ სხვადასხვა თემაზე მუშაობის ფარგლებში, ხშირად სჭირდებათ მიმართონ საჯარო დაწესებულებებს ინფორმაციის გამოთხოვისთვის. შეხვედრის მონაწილეების თქმით, უმეტეს შემთხვევაში, ისინი ვერ იღებენ ინფორმაციას დაუყოვნებლივ, რაც ხელს უშლის მათ საქმიანობას.
  
- შეხვედრის ბოლოს დამსწრე საზოგადოებას მოქალაქის პორტალი და მასთან დაკავშირებული სამომავლო გეგმები წარედგინა. მოკლე განხილვა შედგა ასევე ელექტრონული პეტიციების პორტალის შექმნის იდეასთან დაკავშირებით, რომელმაც სტუდენტთა დიდი მოწონება დაიმსახურა. შეხვედრის მონაწილეთა გარკვეული რაოდენობა თვლის, რომ ასეთი ტიპის პორტალი განსაკუთრებით აქტიურად ახალგაზრდების მიერ იქნება გამოყენებული და ისინი მთავრობას საინტერესო იდეებს შესთავაზებენ.